

Na osnovu člana 222. Zakona o zdravstvenoj zaštiti („Službene novine F BiH“ 46/10) i člana 9. Statuta Ljekarske komore Tuzlanskog kantona, Skupština Ljekarske komore Tuzlanskog kantona na sjednici održanoj dana 10. novembra 2010. godine donijela je, dok je dana 06. decembra 2012. godine usvojila izmjene i dopune Pravilnika čiji prečišćen tekst glasi

**PRAVILNIK  
O POSTUPKU UPISA U REGISTAR LJEKARA TE IZDAVANJA, OBNAVLJANJA  
ILI ODUZIMANJA ODOBRENJA ZA SAMOSTALAN RAD  
(LICENCE)**

**I OPĆE ODREDBE**

**Član 1.**

Ovim Pravilnikom uređuje se postupak **upisa u registar ljekara** te izdavanja, obnavljanja ili oduzimanja odobrenja za samostalan rad (u daljnjem tekstu: licenca) kao i postupak izdavanja licence u slučaju njenog gubitka, otuđenja, oštećenja ili uništenja kojeg provodi Ljekarska komora Tuzlanskog kantona (dalje u tekstu: Komora).

Licenca je javna isprava kojom ljekar stiče pravo da samostalno obavlja poslove u svojoj struci (u daljem tekstu: ljekarska djelatnost) na području Tuzlanskog kantona i kojom dokazuje svoju stručnu osposobljenost iz opće medicine, stomatologije, specijalnosti i uže specijalnosti.

**Član 2.**

Ljekar, koji obavlja ljekarsku djelatnost na području Tuzlanskog kantona (u daljem tekstu: ljekar) dužan je, u skladu sa članom 147. Zakona o zdravstvenoj zaštiti (u daljem tekstu: Zakon) i članom 5. Statuta Komore, nakon položenog stručnog ispita, Komori podnijeti **zahtjev za upis u registar ljekara, čime stiče pravo na izdavanje licence.**

**Član 3.**

Izuzetno, od odredaba člana 2. ovog Pravilnika, Komora može u skladu sa ovim Pravilnikom upisati u registar i ljekara koji obavlja ljekarsku djelatnost u drugom Kantonu, odnosno Brčko Distriktu, pod uslovom da u tom Kantonu, odnosno Brčko Distriktu nije formirana ljekarska komora.

Upisom u registar ljekara, ljekar koji obavlja ljekarsku djelatnost u drugom kantonu, odnosno Brčko distriktu, stiče pravo na izdavanje licence.

**II POSTUPAK IZDAVANJA LICENCE**

**Član 4.**

Ljekar, iz člana 2. i 3. ovog Pravilnika, dužan je u roku od 30 dana od dana položenog stručnog ispita podnijeti **zahtjev za upis u registar ljekara Komore, nakon čega mu Komora po službenoj dužnosti izdaje licencu.**

**Član 5.**

Uz zahtjev iz člana 4. ovog Pravilnika obvezno se prilaže:

1. diploma medicinskog ili stomatološkog fakulteta ili uvjerenje o diplomiranju,
2. uvjerenje o položenom stručnom ispitu, odnosno priznatom stručnom ispitu nadležnog organa BiH,
3. uvjerenje o položenom specijalističkom ispitu, odnosno priznatom specijalističkom ispitu nadležnog organa Federacije BiH,
4. uvjerenje o položenom subspecijalističkom ispitu, odnosno priznatom ispitu iz uže specijalnosti ovlaštenog organa Federacije BiH,

5. uvjerenje o stečenoj naučnoj ili počasnoj tituli,
6. **lična karta i potvrda o prebivalištu,**
7. 1 fotografija,
8. izjava o načinu plaćanja članarine.

Dokumenti, iz prethodnog stava ovog člana, predaju se u fotkopijama, a original ili ovjerena kopija predočava se na uvid.

#### **Član 6.**

Zahtjev za upis u registar i izdavanje licence podnosi se Ljekarskoj komori Tuzlanskog kantona putem Stručne službe Komore.

**O zahtjevu iz prethodnog stava odlučuje predsjednik Komore po prethodno pribavljenoj saglasnosti Komisije za licenciranje (u daljem tekstu: Komisija) i uz odobrenje Izvršnog odbora, u roku od 30 dana od dana podnošenja zahtjeva.**

#### **Član 7.**

U skladu sa odlukom, **predsjednik Komore podnosi zahtjev izdaje rješenje o upisu u registar i izdavanju licence, odnosno rješenje kojim se zahtjev odbija kao neosnovan.**

Smatra se da je zahtjev iz člana 4. ovog pravilnika neosnovan ukoliko podnositelj zahtjeva ne ispunjava uslove za izdavanje licence iz člana 2. ovog pravilnika.

Rješenje iz stava 1. ovog člana je doneseno kada je Komisija dala, odnosno bila dužna da da svoju saglasnost.

Protiv rješenja iz stava 1. ovog člana podnositelj zahtjeva može izjaviti žalbu Skupštinskom vijeću u roku od 15 dana od dana prijema rješenja.

Rješenje Skupštinskog vijeća donijeto po žalbi iz stava 4. ovog člana je konačno i protiv njega se može pokrenuti upravni spor.

#### **Član 8.**

U svrhu davanja svoje saglasnosti, Komisija je dužna razmotriti zahtjev u smislu urednosti i osnovanosti, odnosno ispunjavanja uslova za **upis u registar i izdavanje licence** koji su utvrđeni u Zakonu, ovom Pravilniku i drugim općim aktima Komore.

Komisija je dužna da u roku od 15 dana od dana prijema urednog zahtjeva u skladu sa stavom 1. ovog člana izvrši predsjednika Komore i Izvršni odbor posebnim obrazloženim aktom.

Izuzetno, ukoliko Komisija u roku iz stava 2. ovog člana ne obavijesti predsjednika i Izvršni odbor smatra se da je saglasnost data.

Prilikom razmatranja svakog pojedinog zahtjeva Komisija voditi zapisnik.

#### **Član 9.**

Ukoliko Komisija utvrdi da je zahtjev iz člana 4. ovog Pravilnika nepotpun u smislu člana 5. ovog Pravilnika, pozvat će podnosioca da isti dopuni u roku koji ne može biti kraći od 8 dana niti duži od 15 dana.

Ukoliko podnositelj zahtjeva u ostavljenom roku ne dopuni zahtjev, **predsjednik Komore po prethodno pribavljenoj saglasnosti Komisije** donosi zaključak kojim se zahtjev odbacuje kao nepotpun o čemu će se podnositelj zahtjeva posebno upozoriti u pozivu za dopunu zahtjeva.

Zaključak iz stava 2. ovog člana izdaje se pismeno i sadrži uvod, dispozitiv, obrazloženje i pouku o pravnom lijeku.

Protiv zaključka iz stava 2. ovog člana podnositelj može u roku od 15 dana od dana prijema zaključka izjaviti posebnu žalbu Skupštinskom vijeću Komore.

Odluka Skupštinskog vijeća po žalbi na zaključak je konačna.

#### Član 10.

Ukoliko zahtjev bude odbačen kao nepotpun ili odbijen kao neosnovan, podnositelj zahtjeva može ponovno **podnijeti zahtjev za upis u registar i izdavanje licence**, osim ukoliko nije drugačije propisano ovim pravilnikom ili drugim općim aktima Komore.

#### Član 11.

Ukoliko iz opravdanih razloga ne bi bilo moguće postupiti u roku iz člana 6. stav 1. ovog pravilnika, podnositelju zahtjeva će stručna služba izdati potvrdu o predaji **zahtjeva za upis u registar i izdavanje licence**.

#### Član 12.

U skladu sa rješenjem, Komora je dužna da izvrši **upis u registar ljekara, ljekaru izda licencu i ljekarsku iskaznicu**.

**Upis u registar ljekara, izdavanje licence i ljekarske iskaznice vrši se danom donošenja rješenja u skladu sa članom 7. ovog Pravilnika**, osim ako ovim Pravilnikom nije drugačije određeno.

#### Član 13.

**Licenca mora sadržavati slijedeće podatke: (Licenca u prilogu Pravilnika)**

- ime i prezime ljekara,
- stručni naziv, naučnu i počasnu titulu ljekara,
- stručno područje za koje se licenca izdaje – doktor medicine, doktor stomatologije, specijalnost i uža specijalnost,
- rok važenja licence,
- registarski broj,
- broj licence,
- datum i mjesto izdavanja,
- podpis predsjednika Komore,
- suhi pečat Komore,

Licenca se izdaje u 3 primjerka i to:

- **1 primjerak formata A4 kolor,**
- **2 primjerka formata A4 crno bijeli.**

Ostali sadržaj, oblik i formu licence svojom odlukom utvrđuje Izvršni odbor na obrascu koji čini prilog ovog Pravilnika, osim ako nije drugačije utvrđeno pozitivnim propisima.

#### Član 14.

Licenca može biti redovna i privremena.

Redovna licenca izdaje se za period od šest godina.

Privremena licenca izdaje se za period od godinu dana.

#### Član 15.

Ukoliko u toku perioda važenja licence dođe do promjene činjenica na osnovu kojih je izvršen **upis podataka u registru i na licenci**, ljekar je dužan prijaviti promjenu istih Komori najkasnije u **roku od 60 dana od dana nastanka promjene**, a posebno u slučaju:

1. polaganja specijalističkog ispita ili ispita iz uže specijalnosti,
2. sticanja naučne ili počasne titule,
3. promjene imena ili prezimena.

U slučaju promjene podataka iz tačaka 1., 2. ili 3. ovog člana, **Komora vrši upis promjene u registru i ljekaru izdaje novu licencu na način i u roku iz člana 6. ovog Pravilnika**, a koja važi do isteka tekućeg licencnog perioda na koji je izdata licenca koja se zamjenjuje.

Ukoliko ljekar unutar roka važenja licence iz određene specijalizacije položi specijalistički ispit iz druge specijalnosti, ljekaru se izdaje i nova licenca za područje druge specijalnosti na način i u roku iz člana 6. ovog Pravilnika.

Prijava promjene podataka vrši se podnošenjem zahtjeva za promjenu upisanih podataka uz koji se, u skladu sa članom 5. ovog Pravilnika, prilažu adekvatni dokazi o činjenicama za koje se zahtijeva promjena podataka.

#### **Član 16.**

Ljekar, koji je ljekarsku djelatnost obavljao na području drugih kantona u Federaciji Bosne i Hercegovine, dužan je prilikom podnošenja zahtjeva za izdavanje licence, osim dokumentacije iz člana 5. ovog Pravilnika priložiti i licencu, odnosno potvrdu o članstvu ili aktivnostima u svojoj matičnoj kantonalnoj ljekarskoj komori, te potvrdu o poštivanju odredaba Kodeksa medicinske etike kao i dokaz da se protiv liječnika ne vodi nikakav disciplinski postupak.

Ljekar, koji je ljekarsku djelatnost obavljao u inostranstvu, dužan je prilikom podnošenja zahtjeva za izdavanje licence, osim dokumentacije iz člana 5. ovog Pravilnika priložiti i licencu, odnosno potvrdu o članstvu ili aktivnostima u ljekarskoj komori ili drugoj odgovarajućoj organizaciji u inozemstvu te potvrdu o poštivanju odredaba Kodeksa medicinske etike kao i dokaz da se protiv liječnika ne vodi nikakav disciplinski postupak.

Navedena dokumenta iz stav 2. ovog člana moraju biti prevedena od strane ovlaštenog sudskog tumača na jedan od službenih jezika u Bosni i Hercegovini.

#### **Član 17.**

Nakon izdavanja licence, ljekaru se izdaje ljekarska iskaznica kojom ljekar dokazuju svoje članstvo u Komori.

Ljekarska iskaznica se izdaje na period na koji je izdata i licenca.

Ljekarska iskaznica obvezno sadrži: fotografiju, ime i prezime liječnika, stručni naziv, titulu, registarski broj, vrijeme važenja licence i znak Komore.

Ostali sadržaj, oblik i formu ljekarske iskaznice svojom odlukom utvrđuje Izvršni odbor na obrazcu koji čini prilog ovog Pravilnika.

U slučaju promjene podataka sadržanih na iskaznici, Komora će u skladu sa podnijetim zahtjevom iz člana 16. ovog pravilnika ujedno izvršiti i promjenu podataka na ljekarskoj iskaznici i njenu zamjenu.

Ljekar kome je zamjenjena ljekarska iskaznica, dužan je na zahtjev izdavaoca vratiti zamjenjenu iskaznicu.

### **III LJEKARI – STRANI DRŽAVLJANI**

#### **Član 18.**

Ljekarima – stranim državljanima izdaje se licenca u skladu sa odredbama ovog Pravilnika.

Ljekarima stranim državljanima licenca se, u pravilu, izdaje za razdoblje za koje im je izdata radna dozvola.

#### **Član 19.**

Ljekar – strani državljanin, koji traži izdavanje redovne licence dužan je uz zahtjev za izdavanje licence, osim dokumentacije iz člana 5. ovog Pravilnika, priložiti:

1. radnu dozvolu izdatu u skladu sa važećim propisima o radu stranaca u Bosni i Hercegovini,

2. potvrdu o članstvu u matičnoj ljekarskoj komori,
3. fotokopiju vežeće licence izdate od strane matične ljekarske komore,
4. potvrdu o poštivanju odredaba Kodeksa medicinske etike kao i dokaz da se protiv liječnika ne vodi nikakav sudski niti disciplinski postupak izdata od strane matične ljekarske komore,
5. dokaz o poznavanju jednog od službenih jezika u Bosni i Hercegovini od strane ovlaštene institucije ili ustanove u Bosni i Hercegovini.

Navedene potvrde moraju biti prevedene od strane ovlaštenog sudskog tumača na jedan od službenih jezika u Bosni i Hercegovini.

#### **Član 20.**

Ljekarima – stranim državljanima koji su od strane javne zdravstvene ustanove ili privatne prakse angažovani radi obavljanja povremenih dijagnostičkih i terapijskih zahvata izdaje se privremena licenca na period od jedne godine.

Ljekar – strani državljanin iz stava 1. ovog člana dužan je uz zahtjev za izdavanje privremene licence, osim dokumentacije iz člana 5. ovog pravilnika priložiti:

1. potvrdu o članstvu u matičnoj ljekarskoj komori,
2. fotokopija vežeće licence izdate od strane matične ljekarske komore,
3. potvrdu o poštivanju odredaba Kodeksa medicinske etike kao i dokaz da se protiv liječnika ne vodi nikakav sudski niti disciplinski postupak («good standing») izdate od strane matične ljekarske komore
4. dokaz o poznavanju jednog od službenih jezika u Bosni i Hercegovini od strane ovlaštene institucije ili ustanove u Bosni i Hercegovini, odnosno izjavu da radi obavljanja povremenih dijagnostičkih i terapijskih zahvata verbalna komunikacija s bolesnikom nije potrebna ili je moguća uz posrednika,
5. dokaz o uplati upisnine i članarine za godinu dana.

#### **Član 21.**

Ljekari kojima su izdate diplome medicinskog, odnosno stomatološkog fakulteta te svjedodžbe odnosno uvjerenja o državnom/stručnom ispitu, te specijalističkom ispitu i ispitu iz područja uže specijalnosti, nakon 06. aprila 1992. godine, na području bivše SFR Jugoslavije, od nadležnih organa bivše Socijalističke Federativne Republike Jugoslavije, nadležnih organa njenih bivših socijalističkih republika i autonomnih pokrajina podliježu postupku priznavanja ovih dokumenata u skladu sa važećim propisima u Bosni i Hercegovini.

### **IV POSTUPAK OBNAVLJANJA LICENCE (RELICENCIRANJE)**

#### **Član 22.**

Ljekaru se obnavlja redovna licenca ukoliko je u periodu od 6 godina sakupio dovoljan broj bodova u postupku stručnog usavršavanja utvrđenog Pravilnikom o sadržaju, rokovima i postupku stručnog usavršavanja i provjere stručnosti Komore.

#### **Član 23.**

Ljekar je **dužan dostaviti Komori dokaz/e o ispunjavanju uslova za obnavljanje licence (relicenciranje) najkasnije 3 mjeseca prije isteka perioda na koji koji mu je izdata licenca**, i to :

1. dokaz/e o ispunjavanju uslova potrebnih za obnavljanje licence u skladu s odredbama Pravilnika o sadržaju, rokovima i postupku stručnog usavršavanja i provjeri stručnosti ljekara,
2. izjava da se podnosilac zahtjeva - ljekar nije ogriješio o odredbe Kodeksa medicinske etike i deontologije,

3. potvrda ili drugi odgovarajući dokaz o podmirenju članarine,
4. izjavu u načinu plaćanja naknade za izdavanje licence i ljebarske iskaznice.

#### **Član 24.**

Na postupak relicenciranja adekvatno se primjenjuju odredbe člana 6. – 11. ovog Pravilnika.

#### **Član 25.**

Ukoliko Komisija utvrdi da ljekar nije sakupio dovoljan broj bodova na način predviđen Pravilnikom Komore koji određuje postupak stručnog usavršavanja, predsjednik Komore donosi odluku o izdavanju rješenja kojim odbija zahtjev, te upućuje podnositelja zahtjeva da pristupi ispitu provjere stručnosti pred Ispitnom komisijom Komore.

Uvjeti i postupak polaganja ispita određuju se posebnim aktom Komore.

Nakon položenog ispita, liječniku će se obnoviti licenca s datumom prestanka važenja prethodne licence.

Ukoliko ljekar ne pristupi ili uspješno ne položio ispit iz stava 1. ovog člana, Komora će o tome obavijestiti ministra zdravstva Tuzlanskog kantona i poslodavca.

Kad se stvore tehnički uslovi, ukoliko Komisija utvrdi da ljekar nije sakupio dovoljan broj bodova na način predviđen Pravilnikom Komore koji određuje postupak stručnog usavršavanja, predsjednik Komore donosi odluku o izdavanju rješenja kojim odbija zahtjev, te upućuje podnositelja zahtjeva da pristupi ispitu provjere stručnosti putem testa u elektronskoj formi, instaliranom na web stranici Komore.

Uvjeti i postupak polaganja testa u elektronskoj formi odredit će se posebnim aktom Komore.

Nakon položenog testa u elektronskoj formi liječniku će se obnoviti licenca.

Ukoliko ljekar ne pristupi ili ne položi test, Komora će o tome obavijestiti Ministarstvo zdravstva Tuzlanskog kantona i poslodavca.

#### **Član 26.**

Ljekaru kojem istekne licenca, a u periodu relicenciranja (6 godina) je bio spriječen da se stručno usavršava na način predviđen Pravilnikom Komore usljed :

- privremene spriječenosti za rad (bolest ili porodijsko odsustvo)
- drugih opravdanih razloga
- eventualnih administrativnih propusta,

predsjednik Komore će, uz prethodnu saglasnost Komisije za licenciranje, izdati rješenje o izdavanju licence čiji rok važenja je jednak periodu u kojem je ljekar bio spriječen za stručno usavršavanje.

Ljekar, kojem se izdaje licenca, dužan je dostaviti dokaz o spriječenosti, odnosno potvrdu izdatu od strane nadležne ustanove.

#### **Član 27.**

Stručna služba Komore je dužna, šest mjeseci prije isteka roka važenja licence, obavijestiti ljekara, kao i pozvati ga da dostavi dokaze o ispunjavanju uslova za relicenciranje, u roku iz člana 24. ovog Pravilnika.

### **V ODUZIMANJE I OGRANIČENJE LICENCE**

#### **Član 28.**

Ljekaru odlukom Suda Komore licenca može biti privremeno ili trajno oduzeta ili ograničena s obzirom na opseg i vrstu poslova kojima se ljekar smije baviti, a u skladu sa Pravilnikom o disciplinskoj odgovornosti članova Komore.

### **Član 29.**

Privremeno oduzeta, odnosno ograničena licenca, nakon isteka vremena na koje je oduzeta odnosno ograničena, nastavlja važiti do datuma do kojeg je izdata.

Privremeno oduzetu licencu ljekar je dužan predati Komori.

Ukoliko je u disciplinskom postupku pred Sudom Komore, donesena odluka kojom se ljekaru privremeno ili trajno oduzima licenca, Komora će o tome izvijestiti Kantonalnog ministra za zdravstvo te poslodavca ljekara.

## **VI DOBNA GRANICA OBNAVLJANJA ODOBRENJA ZA SAMOSTALAN RAD**

### **Član 30.**

Ljekaru se može obnavljati odobrenje za samostalan rad nakon 70 (sedamdeset) godina života pod uslovom da je zdravstveno sposoban za obavljanje ljekarske djelatnosti.

Nakon navedene životne dobi, ljekar je dužan svake godine obaviti zdravstveni pregled radi utvrđivanja zdravstvene sposobnosti iz stava 1. ovog člana, a dokaz o izvršenom zdravstvenom pregledu dostaviti Komori.

## **VII IZDAVANJE DUPLIKATA LICENCE U SLUČAJU GUBITKA, OTUĐENJA, OŠTEĆENJA ILI UNIŠTENJA**

### **Član 31.**

Komora će ljekaru na njegov zahtjev izdati duplikat licence u slučaju:

- gubitka licence,
- otuđenja licence,
- oštećena licence u tolikoj mjeri da nije moguće u cijelosti utvrditi podatke koji su u njoj naveden, ili
- uništenja licence tako da se više ne može koristiti kao valjan dokument.

### **Član 32.**

Ljekar je dužan zahtjev za izdavanje duplikata licence iz člana 31. podnijeti Komori u roku od 8 dana od dana saznavanja za gubitak, otuđenje, oštećenje ili uništenje licence.

### **Član 33.**

Po prijemu zahtjeva, predsjednik Komore izdaje rješenje kojim izgubljen, odnosno otuđen, oštećen ili uništen licencu proglašava nevažećom.

Duplikat licence se izdaje u roku od trideset (30) dana od podnošenja zahtjeva. Do izdavanja duplikata licence ljekaru se izdaje potvrda o predaji zahtjeva za izdavanje duplikata licence. Obavijest o proglašenju licence nevažećom, Komora objavljuje u prvom slijedećem broju lista "Medicus".

### **Član 34.**

U slučaju naknadnog pronalaska izgubljene ili otuđene licence, ljekar je dužan istu predati Komori.

Oštećenu licencu ljekar je dužan predati Komori.

Iznos naknade za izdavanje duplikata licence odlukom utvrđuje Izvršni odbor Komore i iste snosi podnosilac zahtjeva.

## **VIII PRIJELAZNE ODREDBE**

### **Član 35.**

Postupci koji su na dan stupanja na snagu ovog Pravilnika u toku pred organima Komore, nastaviti će se u skladu sa odredbama akata prema kojima su započeti.

## VIII ZAVRŠNE ODREDBE

### Član 36.

Ovaj Pravilnik objavljuje se na oglasnoj ploči Komore i stupa na snagu osmog dana od dana objavljivanja.

Stupanjem na snagu ovog Pravilnika prestaje važiti Pravilnik o postupku izdavanja, obnavljanja i oduzimanja odobrenja za samostalan rad koji je donesen 17.05.1999. godine.

Ovaj Pravilnik objavit će se na web stranici [www.ljtk.ba](http://www.ljtk.ba).

Broj: 1362/12

Tuzla, 10.12.2012. godine

PREDSJEDNIK SKUPŠTINE

Mr. sc. Hidajet Rahimić, dr. med. prim.

Ovaj pravilnik je objavljen na oglasnoj ploči Komore dana 10.12.2012. godine i stupio je na snagu dana 18.12.2012. godine.